

THU AWMTE

1.	Editorial	2
	<i>Sermon:</i>	
2.	Thutak hriattir hi Messia rawn kal chhan a ni ..	3
	<i>Ram chhung Pastor-te:</i>	
3.	Rawngbawlna Report	10
	<i>Mission huang:</i>	
4.	Meghalaya Kohhran chanchin	15
	<i>Bible Study:</i>	
5.	Rom Lekhathawn khuhhawwna	22
	<i>Article:</i>	
6.	Kristian Ethics	27
7.	Sunna	31

JUNE THLA CHANG VAWN:

“Lei leh vana thuneihna zawng zawng ka hnenah pek a ni tawh. Chutichuan kal ula, hnam tina mi zirtirahte siam ula, Pa leh Fapa leh Thlarau Thianghlim hmingah chuan baptis ula, thu ka pek zawng zawng che u pawm turin zirtir rawh u. Tin, ngai teh u, kei kumkhuain, khawvel tawp thleng pawhin, inhnenah ka awm zel ang,”



Editorial

Thutak hi eng nge? Thutak a awm chuan; thu tak lo pawh a awm tihna a ni. Tawngna lamah chuan, “I uang reng mai, thutak ve deuh teh,” te pawh kan inti thin. Heta thutak tih leh tuna kan sawi tum hi chu Thutak tih ni ve ve mah se a kawh a inang lova, a sawi tum pawh a inang lo. Thutak ve teh tih chuan thu ho mai mai sawi lovin thu pangngai deuh sawi ve teh emaw, pangngai takin awm ve rawh tihna a ni.

Thutak kan sawi rualin thu dik tih pawh a awm leh a. thil inang reng ni awm tak a nih laiin a danglam hle thung. Thutak chu thu dik a ni a, thu dik zawng zawng erawh thutak a vek kher lo. Inthlanah chuan vote hmu sang ber an tling thin tih hi thu dik a ni; mahse, thutak erawh a ni lo. “Yeshua hi Pathian Fapa a ni” tih hi thutak a ni a, thu dik pawh a ni bawk.

Johana 16:13-ah chuan, “Nimabsela amah, Thlarau dik tak chu, a lo thlen hun chuan thutak zawng zawngah chuan a hruai lut ang che u: amaha phuahchawpin thu a sawi dawn si lo; thu a dawn apiang chu a bril zawk ang; thil lo thleng turte pawh a briattir ang che u,” tih kan hmu a. Heta tanga lang chiang ta chu Thlarau dik tak, chu chu Thlarau Thianghlim a ni. Thlarau Thianghlim chu a lo thleng tawh a, thutak chu kan briat theihin a lo thleng tawh a, chu chuan inbumna thu emaw, thu dik tawh lo lakah min vengin min kaihruai tawh zawk tur a ni.

Thutak tih chu Pathian remruat, a ruahmanna ang zela thil lo thleng, suala tlu tawh, chhandam kan nih lehna avanga a thu ang zel a kan nun kan hman tawhna tura a thu kan zawmna hi thutak a ni. Thutak chuan Pathian kan rinna te, a thupekte kan zawmna te, a duhzawnga nun kan hman theih nan min hruai zel tawh rawh se.

THUTAK HRIATTIR HI MESSIA RAWN KAL CHHAN A NI



Elder David L. Hmar

‘Thupui ka rawn thlan chhuah hi a inhmeh ang em aw?’ ka ti a, a inhmeh loh deuh leh kan la sawi rem mai dawn nia. Chanchin Tha Johana 18:37 kan chhiar chuan, he thu hi kan hmu. “Tin, Pilata’n a hnenah, “Chu, Lal i ni elo?” a ti a. Yeshuan, “Ni e, lal ka ni asin (*Tawng bul lamah chuan, “Lal ka nih thu i sawi zawk a nih chu le! tih a ni*) Thutak hriattir hi ka pian chhan leh khawvela ka rawn kal chhan a ni. Tupawh Thutaka mi apiangin ka thu an pawm thin,” a ti a.

Tum khat chu, Thalai Inkhawm zanah hun min pe ve hlauh mai a. Chumi zan chuan, ka Sermon thupuih “DAWT” tih hmangin thu ka sawi a. Pathian Thu lama tlan tam tak, Reverend te, Pastor te, Moderator te, Team Speaker intite hian Pathian Thu an sawiin –an Kohhran Inzirtirna khawih pawl thei ang chi hi chu Pathian Thutak pawh ni se, an sawi thleng ngam thin lo. “Thih veleha vanram kai’ tih te, ‘thihna tem lo tura lakbo’ tih te, ‘Mitthi vanram kai tura an beiseiten, an thih veleha Pathian fak nghal mawlh mawlh mai tura an inzirtir dan te chu –DAWT a ni,’ tih ka sawi chho va. Kan Lalpa Yeshua ngeiin, khawvela a len lai

khan, “Vanah tumah an la lawn ngai lo; mihring Fapa van atanga lo chhuka chauh lo hi chu,” tih thu a sawite chu –mahni ngaihdan dah lianin an awih duh lo a nih ber hi.

Mi hausa leh Lazara chungchang thute kha TEHKHIN THU a ni tih hi an hre ve vek tho chuan a rinawm; an hre lo thei bawka. Luka 16:19 thuah hian Greek tawngah chuan tiang hian a inziak a, “*eipen de kai heteran parabolen*” —a awmzia chu “*Tebkhin thu dang a sawi leh a,*” a tih hnuah –Mi hausa leh Lazara chungchang thu hi a rawn sawi ta chauh a ni. Hei hi engvanga rawn tarlang nge ka nih? kan tih chuan — Enoka te, Elija te kha

THIHNA TEM LOVIN, PA hnen an thleng lo, an thi ngei a ni tih rawn sawi fiah tumna a ni.

Kan Kohhranah hian, *Lalpa Yeshua hi kan tan a thi lo*, 'tih ring kan lo awm palh ve mial lo maw? Chutiang rinna nei chu lo awm ta se, "Tu zirtirna nge a tem?" tih hi ka hre chak hle a ni. Judaism te hian, 'Lalpa Yeshua chu kan tan a thi lo,' an ti lekfang mai lo. 'Pathian Fapa a ni lo. Judah tlangval, Beth-Lehem khuua piang, Nazareth khuua seilian, *thingrem siamtu (Carpenter)* fapa sat-liah ve maiah an ngai. Pathian mi-tirh kha a nih an ring lo tawp. Kan tan a thih lohvin; tu tan nge a thih ang?

Zawlnei Isaia chuan, 'KAN TAN naupang a lo piang a,' a ti. Chu kan tana nau piang chu a lo seilian a; keini, Pathian laka mi hrang ni tawh kha – Pathian faa vuaha kan awm leh theihna turin Kalvary-ah KAN TAN Yeshua a thi a ni lo'm ni? Thlanah zalhin, Ni thum leh zan thum a bikimah chiah – thlan atanga tho lehin, thinga khai a nih lai mek khan i sual leh ka sual man bat min tlaksak a, thlan ata kaihthawh a nih hnuin Thenthilhlan tuk khan Ama thisen ngei kengin Van Biakbuk, kuta sak ni lo – Pathian Yahweh hnenah a han hlan fel a ni lo'm ni?

Luka 24:13-a – 'an zinga pahnih' a tihte hi tute zinga mi nge? Lalpa Yeshua zirtirte zinga mi an ni lo'm ni? Emmau khuua kal tur te kha? He mite pahnih hian Yeshua kha a thi chiang a ni tih an hria, an pawla hmeichhia – thlan ena kalte'n, 'A awm tawh lo,' tih an rawn hrill a, an tihmangan thu pawh an sawi chiang. Yeshua pawh hi a che mak ve thei tlat! A hriatsa reng, an zawt lui kher a, "Kal paha in sawi dun kha engnge?" Kleopa lah khan a chhang ril ngeiawm thiam baw. "Jerusalem khuuah nangmah chauhin em ni i chen? Tunlaia thil awmzia hi i hriat loh ni!" Yeshuan, "Eng thil maw?" a ti a. Tin, anni chuan a hnenah, 'Nazareth Yeshua, Pathian leh mi zawng zawng mithmuha – a thu-ah leh a thil tiha zawlnei hmingthang tak chanchin thu; puithiam lalte leh kan hotuten thah thu pek turin an hruai a, kraws-a an khenbehzia thute pawh kha. Keini'n Israel-te Tlantu tur kha a nih kan beisei tehlul nen! (*Beiseina beidawng an ni*) Engpawh ni sela, chung thil thlenna chin chu waviin nen ni thum a ni tawh. Chung lo pawh chu kan pawlte hmeichhia, tute emaw, zingah a thlanah an va kal a, min rawn timang-ang a; a ruang hmu si lovin, 'Pathian vantirhkohte inlar kan hmu a, chu mite chuan a nung leh tih an sawi e,' an rawn ti a.

Tin, kan awmpui zinga tuteemaw thlanah chuan an kal a, hmeichhiate sawi ang ngeiin an hmu a; nimahsela, Amah chu an hmu si lo va,” an ti a. Tin, ani chuan an hnenah, “Mi ate u! Zawlneite thusawi zawng zawng awih kawnga ngawngte u! Messia’n chung thil chu tuarin a ropuinaah a lut tur a ni reng love’m ni?” a ti a. Tin, Mosia (TORAH) leh Zawlneite zawng zawng (HAFTARAH) lehkha-ah a tan a, Pathian Lehkha zawng zawng (TANAKH)-a Ama chanchin ziak apiang chu anmahni a hrilhfiah zel a.

He thu ka rawn thurchbhuah nachhan hi engnge ni? kan tih chuan, Thutak chu engti kawng zawng pawhin hup beh tum thin mah ila; A HUP BEH THEIH LOH tih rawn sawi fiah tumna a ni. Emmau tih hi TUISA CHIK CHHUAK tihna a ni a, tuisa rawn chik chhuak hi hup beh han tum chhin teh, i kut a kang mai lovang maw? Tute nge Petera leh Johana, Thlarau Thianghlimin a chhun khah hupbeh tumtute kha? Tirhkohte Thiltih 4:1-21 chhiar leh lawk teh ang. “Tin, Petera leh Johana’n mite hnena thu an sawi lai chuan, puithiamho te, Synagogue hotu te, Saddukai hote chu an hnenah an lo thleng phut a, mi an zirtir leh Yeshua mitthi zing

ata thawhleth thu an hrilh avangin an lungni lo em em a. Tin, an man a, tlai lam a nih avangin atuk thlengin tan inah an khung ta a.

Nimahsela, thu ngaithla hote zinga tam takin an awih a; an tam lam pawh patling hlir pawh sangnga lai an tling a. Tin, atukah chuan –an hotu te, upa te, lehkhaziaktu te, Puithiam lalber Ana te, Kaiapha te, Johana te, Aleksandra te, Puithiam Lalber chi zawng zawngte pawh Jerusalem khuaah an awm khawm a. Tin, Petera leh Johana chu a laiah an dintir a, “Eng tih theihnain nge, Tu hmingin nge heng hi in tih?” an ti a, an zawt a. Tichuan, Petera chu Thlarau Thianghlimin a khat a, an hnenah, “Mi zawng zawng hotute u, upate u, mi chak lo tihthat thu-ah, ‘He mi hi engvangin nge a lo dam tak?’ tiin vawiinah hian min chhuahchhalh chuan, nangni zawng zawngin hre rawh u, Israel mi zawng zawng pawhin hre rawh se, ‘Nazareth Yeshua Messia, in khenbeh, Pathianin mitthi zing ata a kaihthawh leh kha, Amaha hming ngeiin he mi hi hetah, in hmaah damin a ding ta a nih hi. Nangni, in satute u, in lung paih, a kila lung tangkai ber lo ni ta kha Amah hi a ni e. Mi dang tuma hnenah chhandamna a awm lo; van hnuai mihring sak zingah, min

chhandam tur hming dang reng a awm lo,” a ti a.

Tin, Petera leh Johana huaizia chu an hmuhin, lehkha thiam lo, mi mawl tak an ni tih an hriatin –mak an ti hle a; ‘Yeshua hnenah an awm tawh’ tih an hre ta a. Tin, mi an tihdama chu an hnena ding an hmu a, engmah an sawisel thei si lo. Chutichuan, an rorelna ata an kal hrantir hnuin – an inrawn a, “Heng mite hi engtin nge kan tih ang? thilmak thang tak an ti tih Jerusalem khuaa awm zawng zawngin fiah takin an hriat tak hi; keini pawhin kan hnial thei si lo. Nimahsela, mi hnena a puan lehzual theih loh nan, tun achinah –tu hnenah mah HE HMINGA thu an sawi lohna turin, i vau ang u,” an ti a. Tichuan, anni chu an ko va, **Yeshua hminga thu sawi tawp loh tur leh zirtir tawp loh tur** an ti tlat a. Nimahsela, Petera leh Johana’n an hnenah, “Pathian mit-hmuhin Pathian Thu zawm aiin; nangni thu zawm a dik zawk emaw chu –ngaihthuah rawh u. Keini zawng, thil kan hmuh leh kan hriatte kha sawi lovin kan awm thei lo,” an ti a. Tin, anni chuan an vau lehzual a, an chhuah ta a, mipui avangin hremna remchang an hmu lo; an thil tih avang khan mi zawng zawngin Pathian an chawimawi si a.

Khap-beh tumtute hi Messia lo kal vawihnihna, nung dama an nghak thleng zo lo a nih ngat chuan, tihdanglamin an awm ve dawn lo, tihna a ni a. An chan tur chu boralna a ni. Thutak hup-beh theih loh chu tuisa chik chhuak khuaah chuan –a zirtir, Kleopa te thian dun hnenah puan chhuahin a awm ta.

LALPA chu fakin awm rawh se.

Joba 19:25-27-ah chuan, heti hian ziaa a ni bawk, “Ka Tlantu chu a nung tih ka hre si a, nakinah chuan leiah hian a lo la ding ang. Ka vun hi tihchhiata a awm hnuin, ka tisain Pathian ka la hmu ang. Keima tan ngei ka la hmu ang a, ka mitin a la thlir ang a, mi dang ni lovin,” –“**Ka Tlantu chu a nung tih ka hre si a ...**” —hei tak mai hi a pawimawh lai chu a ni. “KA TLANTU” Joba’n a tih chuan, a Tlantu chu Lalpa Yeshua a ni dawn lo’m ni? Lalpa Yeshua hi ka tan leh i tan –a thi a, kan thawhhmahruaitu niin A tho leh Chiang a ni lo’m ni?

Lalpa Yeshuan ’hring a chan hma khan –Joba chuan a lo hmulaawk diam tawh a, a Tlantu –ahring ahrana a hmuh hmaw a thi a, nakina a la hmuh leh tur thu hi a sawi asin! Ama mit ngeiin, mi dang mit ni lovin — a

chiang a ni. Hebrai 11:23-26-ah pawh, “Rinnain Mosia chuan a lo puitlin hnu khan Pharaoa fanua fapaa vuah a duh lova; rei lo te atan sual nawmna hlimpui ai chuan; Pathian mite nena tihduhdah tuar a thlang ta zawk a. Messia an hmuhsitna chu Aigupta ram rote ai chuan sum ropui zawkah a ruat a; lawmman pek tur chu a thlir thin avangin.” —“**Messia an hmuhsitna**” hi, nang leh keia tan a nih lohvin; tu tan nge ni ta ang? Zawnei Isai-a'n tu chungchang nge a sawi a, Isaia 53:1-12 hi chhiar ang aw, “Kan thu sawi tuin nge ring? LALPA kut chu tu hnênah nge a lan? A hmaah chuan huan thil tiak no tak angin Ani chu a chawrchhuak si a, lei ro atanga zung angin a puak chhuak bawk a ni: pianhmanng thatna leh hmêl mawina rêng rêng a nei lo va; Amah kan hmuhin Amah kan duhna tûrin mawina rêng rêng a awm lo. Ani chu mihringte hmuhsit leh duh lohvin a awm a; lung-ngaihate nei mi leh natna hre mi a ni a: mite'n an hmai an huhsan ang chuan, Ani chu hmuhsitin a awm a, keini lah chuan ani chu kan ngaisâng si lo. Ani chuan kan natnate phurin, kan lungngaihate pawh a phur ngei a: nimahsela, keini chuan lungngaihna tlakbuakah, Pathian vuakah, tihre-theihah kan ngai si a. Nimahsela, Ani chu kan bawhchhiatnate avângin

hliamin a awm a, kan khawlohnate avângin vuak thitlinin a awm a; kan thlamuanna tûr thununna chu a chungah a tla a; a vuakna vualtea tihdamin kan awm ta. Kan za hian berâm angin kan vâk bo va; mahni kawng kawngah kan peng theuh va; LALPA chuan Ani chungah chuan kan zaa khawlohna chu a nghat ta a. Ani chu hnehchhiahin a awm a; nimahsela, a inngaitlâwm a, a ka pawh a ang lo: berâm no talh tûra an hruaia ang leh, berâm a hmul mettu hmaa a ngawi renga awm ang maiin; a ni, a ka a ang lo. Hnehchhiahna leh rorêlnaa lak bovin a awm a; a dam rualpui lekphei chu tuin nge mi nung ram ata tihborala a awm chu ngaihtuah tehlu ni? Ka mite bawhchhiatna avângin lung-ngaihna tlakbuakin a awm a ni. Tin, thil rawng taka ti ngai lovin, a kaah tihderna rêng rêng awm ngai lo mah sela, a thlan chu misualte hnên lamah an ruatsak a, a thih hnu chuan mi hausa hnên lamah a awm a. Nimahsela, LALPAN ani chu vuak thitlin a duh reng a ni; a tina ta ngei a: a nunna chu sual tan thil hlana i hman tikah, a chi-thlah chu a hmu tawh ang a, a dam chhûng nite chu a tisei ang a, LALPA duhzawng chu a kutah hlawhtlingin a awm ang. A nunna thawhrim rah chu a hmu ang a, a lungawi tawh ang: ka chhih-

hlahw fel tak chuan a hriatnain mi tam tak chu thiam a chantir ang a, an khawlohnate chu a phurhsak ang. Chuvangin, Ani chu miliante chanvo ang ka sem ve ang a, Ani chuan rállák sumte chu mi chakte a sem ve ang; a nunna chu thi khawp hiala a leih buak a, bawh-chhetute zinga chhiar tela a wm avângin: nimahsela, mi tam tak sualna chu a phur a (*Leviticus 16-a Azazela Pual aumzia i bre chiang ta hle*), bawh-chhetute tan chuan a tawngtaisak a.”

Isaia hian kan Lalpa Yeshua chanchin a lo sawilawk diam a ni. Nang leh keia tana a tawrhzia hi! I tan pawh a ni tih i pawm ve thei em? Sawi tur a va'n tam tak em! Engtin nge 'KAN TAN A THI LO' kan tih theih zawk le! Jews-ten Synagogue-ah HAFTARAH hmangin TORAH an zir chin zel tlang an kawm thin. Isaia 53 hi Synagogue-a chhiar hlahw ve ngai a lo a ni – Mitilreh pawh khan a thu chhiar awmzia hrethiam tur a ni lo reng a ni, hrilhfiat a nih takah khan Pathian faa vuahin a awm zui ta a nih kha – Baptistu Johana te, Petera, Johana leh Paula ten – Synagogue-a tihrik, chhiar hlahw ngai lo Isaia 53 thu hi an va hril uar si em? Sual phurtu Yeshua chanchin an va hril chiang tak em! Azazel Pual tih pawh, Setana an puh hauh lo.

Phillippi 2:5-8 chhiar leh ila. Nang

leh kei avanga “Pathian anga awm leh Pathian tluka awm pawh thlahlel thei lovin –chhandam ngai kan nihzia hriain, mualphona vawrtawp tuara thi hialin –a lo kal asin. “He rilru, Messia Yeshua pawha awm bawk kha, nangmahniah awm rawh se; Ani zawngin Pathian (Yahweh) anga awma Pathian tluka awm chu thil thlakhlelh hleih theihah a ruat lova, mihringte anga lo piangin, bawi angah a insiam a, amah leh amah a intitlawm ta zawk a. Tin, mihring anga lo awmin, a inngaitlawm a, thi khawp hiala Thu zawmin a lo awm ta a, kraws-a thihna ngei chu.”

Keini Kohhran hi chu –KAN DANGLAM A NI tih kan inhriat chian a tha. Messia Yeshua thih leh thawhlehna ringawtah hian, Van Biakbuk rawngbawlina a hlenchhuah te te loh chuan – Pathian nena INREMNA tluantling a thleng mai lo tih hi kan chiang tur a ni a. Pathian thil tum pawh a ni a, Pathian Thutak pawh a ni bawk. Ngaihdam kan nihna kha kan Lalpa, Yeshua khan a tih tur a hlenchhuah takah khan a chiang ta.

Abib18, AD 30 zingkar – Thenthilhlán Tukah khan, Chanchin Tha Johana ziak Bung 20:15-17-ah, “Yeshua'n a hnenah, “Hmeichhia, engati nge i tah? Tunge i zawn?” a ti a. Ani chuan *huan enkawltu [thenthilhlán*

tuk a ni tlat!] emaw a ti a; a hnenah, “Ka pu, Amah heta ta i kalpui a nih chuan [*a ruang ruk bo tia intihder a nih hman tawh si kha*], i dahna chin mi hrilh ang che, chutichuan ka la ang,” a ti a. Yeshua’n a hnenah, “Mari,” a ti a. Ani chu a hawi a, a hnenah, Hebrai ṭawngin, ‘RABBONI,’ a ti a. Tin, Yeshua’n a hnenah, “Mi vuan suh; tun thleng pawhin Pa hnenah ka la lawn chho lo a ni; amah-erawhchu, KA UNAUTE hnenah va kal la, an hnenah, ‘Ka Pa, in Pa, ka Pathian, in Pathian hnenah ka lawn mek e,’ a ti e, ti rawh,” a ti a.

Pathian tana Ama thisena min leina thisen ngei kha, Van Biakbuk, kuta sak ni lo, LALPA sak zawkah khian –lei lam puithiamte hlimthla rawngbawlna kha a tak ngeiin a han hlen ta a ni. Puithiam lalber rawngbawl hna a thawh laiin thutthleng a nei lo. Tholeh Yeshua rawngbawlna kimchang nemngheh nan Hebrai 8:1-6 chhiar Chiang leh ila. “Tichuan, kan thusawite zingah hian a pawimawh ber (*laimu ber*) chu hei hi a ni: Chutiang Puithiam Lalber, vanahte khian Ropuibera lalthutphah ding lama han ṭhua Hmun Thiang-hlim leh Biakbuk tak tak — mihring sak ni lo, LALPA sak zawka Rawngbawltu chu kan nei, tih hi. Puithiam Lalber apiangte chu thilpek leh inthawinate hlan turin ruat an ni si a; chutichuan, he Puithiam Lalber

pawh hian ENGEMAW TAL hlan tur neih a ngai a ni. Leiah hian lo awm sela chuan, puithiam reng a ni lo vang [*lei biakbuka puithiam te kha chu Levia an ni; Yeshua erawh Lal hnam Judah*]; Dan thu ang zela thilpek hlantute lo awmsa an awm avangin. Chungte chuan van thilte chu a lem leh a hlim rawng an bawl ṭhin a, Mosia’n Biakbuk a sak dawn laia Pathian hrilha a awm ang khan; “Tlanga entawn tur chu an entir che ang khan, engkim siam turin fimkhur rawh,” a tih kha. Tunah erawh chuan **Thuthlung ṭha lehzual palai** a nih ang zia zelin –**rawngbawl hna ṭha zawk** a lo chang ta, chu Thuthlung chu **Thutiam ṭha zawk** chungahte siam a ni.”

A tawp berah chuan — Unau duhtak, kan Thupui ang khan, “THUTAK HRLATTIR” hi Messia rawn kal chhan a nih angin — chu thu bawk chu Matthaia 28:19-ah hian min chah mawlh mawlh a ni. Chu chanchin bawk chu Apostle-te thuhiril uar ṭhin tho kha a ni. He chanchin hi a dik ngei a ni tih i hriat chian theih nan Bible chang pawh ka rawn tar chhuak hnem hle. Heng chang lo pawh hi – Pathian Leikhathu chang rintlak tam tak a la awm. Pathian Thutak tungding la, hril chhuak bawk la – a dik lo chu namthlu ngam zel ang che. Pathianin, a Thutak kan puanchhuah hi – kan za atan malsawm rawh se.

RAMCHHUNG PASTOR-TE RAWNGBAWLNA REPORT

— Elder David L. Hmar, General Secretary



Pastor
ST John Beingchhie



Pastor
C. Liansanga



Pastor
H. Lalfakzuala



Pastor
Robert Malsawmsanga

Pastor ST John Beingchhie:

Date 4.5.2023 khan Mamit Bial fangin a chhuk a, Bial hruaitute nen hun hman dan tur an ruahman a. Mamitah Sabbath nih thusawina hun a hmang a, Phaizau erawh chu langin Bial hruaitute nen an tlawh. Khaw dang chu Aizawl atanga kal remchan zawkna avangin a kir leh ta rih.

Ni 16.5.2023 khan Lalkawlkhuma leh Lalzekimi te chu Synod Conference Centre-ah Kohhran Dan thianghlimin a inneih tir.

Dt. 21-22.5.2023-ah Pastoral meeting leh Retreat-ah a tel a. Ni 26.5.2023-ah Vairengte tlawhin Sabbath a hmanpui a, inkhawm banah Rawnal Luiah Lalpa Yeshua hmingin Ringtu Baptisma a chantir. Chungte chu –

1. David Lalrinmawia
S/o Hk. Laltharzela.
2. Jacob Lalrinzuala
S/o Hk. Laltharzela
3. Mesak Lalthafamkima
S/o Lalramzauva
4. Lalbiakdiki D/o Lalramzauva

Dt. 28.5.2023/8 Sivan 5783 AM-ah hlim takin Pentecost hman a ni.

Dt. 31.5.2023, 1.00pm-ah Messiah-a kan Rawngbawlpui Pi. H. Zothansangi Thawhlehna hmasaa inhmuh leh turin a vui.

Pastor C. Liansanga:

Dt 30.3.2023- 3.4.2023 inkar chhung khan, Siaha District khawmpui leh Biak in hawn inkawp Programmme chu hman a ni. Zawnglingah hian Kohhran members 15 bak an awm tawh lova; a in zawngin In 5 vel a awm a ni.

Hetah hian an hruaitu ber Pastor M Chathaw chuan thawhlehma hmasa nghakin a lo muthilhsan tawh bawka ni. A dam laia a vei em em chu, Biak in sak that a ni.

Mi dang puihna tel miah lovin ama sumin Biak in lian tha pangngai tak a din a; 80% a zo tawh ti-ah vanduai thlaktakin a thihsan ta mai a; a fapa M Lalrinfela chuan, chhunzawmin sum sen ngai zawng zawngte pawh ama sum liau liauin a chhunzawma ta a ni. Pi Nuzii leh an pa, Lalrinfela te hi an fakawm hle a ni. He Biak in hawn hi District Conference nen inkawpin hlanna neih a ni ta a ni. Bial chhung khaw sawm leh pakhat atangin Palai 146 an fuan khawm a, Biak in hi Bialtu Pastor C. Liansanga'n a hawng. Sunday niah rorelna neih a ni a, PKHP leh District Board hruaitute inthlanna neih nghal a ni. Kum 2023-2025 inkara District Board hruaitute:

1. Chairman : Elder J. Kharchina
2. Vice Chairman : Elder C. Lalawia
3. Secretary : Deacon Asa
4. Asst. Secretary : Deacon Ramtinthanga
5. Treasurer : Deacon C. Sanduailova
6. Fin. Secy : Evan Daniel Lalhmingkima

Kum 2023-2025 PKHP Hruaitu tharte —

1. President: Pi Lalramdingliani Siaha
2. Vice President: Pi Nuzii, Tuipang

3. Secretary: Pi C.Lalramngaihzuoli Siaha
4. Asst, Secretary: Pi Lawmnapari Siata
5. Treasurer: Pi. Lalramfawni, Siaha
6. Financial Secretary: Pi Benjamin Siaha
7. Adviser: Evan Daniel Lalhmingkima, Siaha

Baptistma chang tharte:

1. Zion Laldinthari, Siaha
2. Abija, Siaha
3. Z . Sihlu, Siaha
4. Loleipachhyng, Zawngling
5. Obeda, Chhuarlung
6. Cindy Beidaoki, Siaha
7. Ramchhanthangi, Siaha
8. Zonunmawia, Niawhtlang

Khawmpui chhunga ei turin Bawng patuai pahnih an thawh. Dt 8.4.2023-ah Lalpa Zanriah leh Chhang dawidim telh loh Kut hi Niawhtlangah a hmanpui a, Dt 9.4.2023 Sunday zingkarah Lal Yeshua Messia hmingin Mi Pahnihin Baptistma an chang. Chungte chu:

1. Malsawmdawngzela, Niawhtlang
2. Lalroa, Niawhtlang

Dt 10.4.2023 khan Niawhtlang atangin Siaha Pastor Quarters-ah an insawn thla ve leh ta a ni.

Dt 15.4.2023 Sabbath chu Siaha-ah an hmanng nghal a, Kohhran hote pawn an lo lawm hle a, Sabbath ni

chuan, Member thar Pu Lalnunsanga College Veng, Siaha chu a lawmlut nghal a, Tuipui Ferry-ah Yeshua thihna leh thawhlehna tawmpuiin Baptistma a chantir nghal baw. LALPA chu fakim awm rawh se. Circle PKTP-ten Master of Theology a zir chhuah lawmpuina Citation an hlan a; CTP District hmingin Citation hlan a ni baw. Siahaah hian Local Board inthlanna a neihpui a, Siaha Local Board hruaitu tharte chu:

- 1.Chairman: Elder J Kharchina
- 2.Vice Chairman: Deacon M Leizia
- 3.Secretary: Deacon C Sanduailova
- 4.Asst Secretary: Deacon R Ramtinthanga
- 5.Treasurer: Deacon Asa
- 6.Fin. Secy: Evan Daniel Lalhmingkima

Dt 22.4.2023 khan Bualpui(Ng)-ah Sabbath a hmang a; Pathian thuchah a sawi a, Sabbath niah Mesak Lalrinhlua s/o Lalrinngeta chu Pathian hnenah hlan a ni baw. Inkhawm banah kohhranhote nen in tin fang kualin Kohhranhote an tlawh chhuak a, tawngtaina leh fuihna thu a sawi zel baw.

Dt 29.4.2023 khan Siata Circle PKTP-te chu Executive Committee leh Leadership Training neihpui turin a kal a, Sabbath niah Pathian thuchah sawina hun a hmang a, Inkhawm banah Leadership Train-

ing a neihpui nghal a. Leadership awmzia leh mawhphurhna hrang hrang a sawfiah baw a; Thalaim lam atangin zawhna leh chhanna hun an hmang baw a, an hlawkpui hle a ni.

Dt 12.5.2023 khan an nupain Lawngtlai-ah Sabbath hmangin an kal leh a, Sabbath ni chu hlim takin inkhawmna an hman pui. Lawngtlaiah hian Evan. HC Lallawma Diltlang a lo awm lai tak a ni a, a hovin Sabbath hlim taka hmanho a ni. Pathian thuchah sawiin “Rinawmna” tih thupui hmangin thu a sawi a, Evan. HC Lallawma hnen atangin Pathian thuchah leh Bangladesh an zin report ngaihthlak a ni baw. Inkhawm banah inkawmhona neih zui a ni a; Kohhranhote tlawhin, tawngtaina hun a hmang zel baw.

Pastor H. Lalfakzuala:

Dt.01.04.2023 Sabbath inkhawm ban khan PKTP Champhai Branch hruaitu inthlanna a neihpui. Dt.5.04.2023 khan Khawzawlah LALPA Zanriah leh Kalhlen kût hmang turin an nupa bakah Pi Vanlalhriati te nen an kal a, ruahman lawk angin Tualte kohhranhote Khawzawlah a phurthla leh a, a huhoi Lalpa zanriah leh Kalhlen kût hlim takin Khawzawlah

an hmangho a ni. LALPA in-khawmpui thianghlim a huhova an hmang chu tisa leh thlarauah an hlim tlang a, hlawk thlak an ti.

Dt.12.04.2023 Chhang dawidim telh loh kût ni sarihna chu Champhai kohhranah a hmang a, "Dawidim hlui chu thian fai rawh u" tih hmangin Pathian thuchah a sawi a, kohhranhote pawh an hlim tlang viau. Tlai lamah Kût ruai an kilho. Dt.15.04.2023 Sabbath khan PKHP Champhai Local inthlanna a neihpui a, kumin November thla hian MPKHP inkhawmpui Champhai Local-in a thlen dawn avangin kohhran Hmeichhiate pawh an tang hle.

Dt.22.04.2023 khan Champhai Circle Conference vawi 44-na rorel leh hruaitu inthlanna a neihpui. Hruaitu thlan tharte:
Chairman: Elder T Dengthuama, Champhai
Vice Chairman: Elder C Thangseia, Mualkawi
Secretary: Elder F Tharzuala, Champhai
Asst. Secretary: Deacon Zokhum-sanga, Champhai
Fin. Secretary: Deacon C Malsawm-tluanga, Champhai
Treasurer: Elder JH Lalbiakngheta, Champhai

Rawngbawla a zin chhuah loh lai hian Champhai kohhrante in hrang

hranga kalin a tlawh kual thin a, fuihna leh tawngtainate a neihsak thin. Tin, Kohhran hnatlangte pawh an nei thin a ni.

Dt.06.05.2023 MPKHP hruaitu Champhai lo zin tawiaawmin hun a hmang a, Kohhran Programme hman zawhah Mualkawi leh Zotlang kohhrante a tlawhpui bawk.

Dt.12.05.2023 khan bial fangin a zin chhuak a, a tuk Sabbath chu Vankal kohhranah hun a hmang a. Sunday-ah Tawitawkawnah a kal ve leh a, Khawzawl Circle-in Financial Campaign tura an rel angin a zinnaah hian thilpek pawimawhna leh a tulnate sawi mai bakah thilpek hrang hrangte a la khawm nghal zel a ni. Tin, Khawzawl Circle sum pawh endikna a neihpui bawk a ni. Kohhran chhungkaw tinah fuih leh tawngtaina neiin a tlawh bawk.

Dt.19-22.05.2023 chhung khan Aizawl kohhranah Pastoral Committee leh Retreat-ah a tel a, zan lamah MPKTP Committee a telpui bawk. Mission Department ruahmannain Pastor HC Zosanga, Mizoram Conference Chairman nen Champhai Zotlangah tahrak 25.05.2023 atang khan rawngbawlana an nei dun a, Sabbath leh Pentecost pawh Zotlangah rawng-

bawlina an hmang a, a remchan ang zelin la neih zel an tum a ni. Mission rawngbawlina an neih avang hian bial fan pawh a chawl rih ang.

Pastor Robert Malsawmsanga:

April 1st, 2023 Sabbath kha South Bungtlangah a hmang a, chawhma inkhawmah Pathian Thu sawina a nei a. Sebastian Lalpekhlua (thla 2) s/o Pu Lalruatfela leh Vanessa Malsawmzuali (thla 4) d/o Pu Joel C Lalthlamuana te Pathian hnena hlanna a nei bawk a ni. April 2, 2023 Hemi ni hian Pi Vanropari Hlawnychhing w/o Deacon HC Dengzauva leh Pi Eunik w/o Pu Thomas L Chawngthu te chu Sekulh luiah Yeshua Messia hmingin baptisma a chantir a, kohhran puipaten an tawiawm tha hle.

April 5, 2023 Lunglei Kohhranah LALPA Zanriah a buatsaih a, Elder Kapchhawna'n a pui a, Biak In thleng thei lote hnenah pawh pek/sem vek a ni a. Tuisen chhuaha awm mek Pu Abbey L Hnamte te nupain video call hmangin an lo chhim ve bawk a ni. Biak Inah mi 33-in an kilho thei a, hlim takin hun an hmang. April 6, 2023, a tuk Kûta Pathian Biak inkhawmah thuchah sawina a nei a, inkhawm an thain zaihona hun hlimawm tak an hmang thei bawk. Tlai lamah

ruai tui tak kohhran-hoten an kilho nghal.

April 8, 2023 Sabbath Lungleiah a hmang a, inkhawm banah Lunglei Local Board inthlanna a neihpui a. Hruaitu thlan chhuah tharte chu: Chairman: Deacon V Laltlankima Vice Chairman: Elder Kapchhawna Secretary: Deacon Agassi Zoramawia Asst. Secretary: Pi Laldingngheti Treasurer: Pi R Lalhlupuii Fin. Secretary: Deacon Lalrammawia

Tualchhung Kohhran sum a audit fel hnuin April 10, 2023 khan Deacon R Laltpuia te in, Ramtharah hruaitu hlui leh tharten charge inhlanna an nei a. He hunah hian hruaitute fuihna hun tha tak a hmang bawk a ni. April 12, 2023 Chhang dawidim telh loh Kût ni 7-na Lungleiah a hmang a, Pathian Thuchah puan chhuahna a nei. Kohhranhote inkhawm an thain an hlim hle.

April 14, 2023 khan Zochampuii Hnamte leh Endrico Kruusimaa te Pathian leh kohhrante hriatpuiin, DC Inn, Durtlangah an dam chungna nupa ni turin a innehtir. April 14, 2023 zanah PKTP Aizawl Branch-te inkhawmnaah a tel ve a, sharing sawina hun ka hmang bawk a ni.

April 15, 2023 Sabbath kha Aizawl Local Church-ah a hmang a, Elder J Lalthankima'n a hun a kiana, "Theipui hau hlum thu" changthlanin Pathian thuchah a sawi. April 16, 2023 khan Bangladesh-ah Evan HC Lallawma nena tih an nih avangin, an thu ken tur leh tih turte sawihona Mission Department Committee member-ten Joint Meeting Aizawl Local Church, Sabbath Sikul Hall-ah an neihpui.

April 18-28, 2023 (Bangladesh zin thu): Aizawl atangin Agartala panin April 18 tlai dar 5-ah an kal a, tluang takin a tuk April 19 dar 10am-ah an thleng. Bangladesh kal theihna tur visa an buaipui nghal a, April 21 tlai lam dar 3-ah an hmu thei a ni. April 22-ah Bangladesh an pan a, an tum ram tak Bandharban District chu ram buai avangin an lut thei lova, Chittagong-ah kohhran hruaitute nen meeting an nei a ni. An tih tur t̄ul leh pawimawh zual an tih theih ang angte an tih fel hnuin April 26-ah Bangladesh atanga lo kir lehin tluang takin April 28-ah Lengpui Airport an lo thlenga, Mission Director-in, Lengpuiah a lo zuk hmuak a, Kohhran Office-ah lutin Evan. HC Lallawma'n report a pe. Aizawlah tih tur t̄ul leh pawimawhte a tih zawh

hnuin May 2, 2023-ah tluang takin Lunglei a thleng.

May 5, 2023 Sabbath kha Lungleiah Sabbath a hmang a, Sermon hun a chang. Zing karah theih ang angin kohhran mi damlote a tlawh kual a, tawngtaina hun a hmang. May 13, 2023 Sabbath khan Lunglei Farm vengah mitthi an neih avangin Sabbath in̄tan zanah chiah inkhawmna an nei thei a. Biak In hawnga inkhawm a theih tak lohah chuan Deacon R Lal̄tanpuia cancer natna tuar mek kan pahin inkhawmna hun a thei apiangin an neihpui a, mi pali an kal khawm thei a ni. He inkhawmna hi a kaihruai a, "Cancer-in a ngam lohte" tih thu hmangin thusawina a nei a, Pi Laldingngheti pawhin fuihna thu a sawi a, Deacon R Lal̄tanpuia pawhin lawmthu sawina leh fuihna thu tha tak a sawi bawk a ni.

May 20, 2023 Sabbath kha Chhipphirah a hmang a, Sabbath in̄tan zan leh chawhma inkhawmah sermon hun a chang. A tuk May 21, 2023 Sunday zingah Pastoral Committee meeting-naa tel turin Aizawl a pan a, Elder Vanlalsanga, Chhipphirin a zui bawk a ni. Zan dar 7-ah MPKTP General Conference Organizing Committee member-te
(*Chhunzawmna phok 30-naah*)

CHURCH OF GOD (SEVENTH DAY), MEGHALAYA KOHHRANCHANCHIN TLANGPUI

Thuhmahruai: A hmasain, Church of God (Seventh Day), Mizoram Conference Mission Department-a kan hotute chungah lawmthu ka sawi a. Anmahni kaltlangin Pathianin Meghalaya-ah rawngbawlina chhinchhiah tlak tak May 4, 2023-May 14, 2023 chhung khan min pe a. Rawngbawlpuite – Elder Isaac Hnamte, Evan Joseph T. Hnamte leh Agassi Zorammawia te chungah pawh lawmthu ka sawi duh a. Anmahni zarah thil tam tak ka zir belh a ni. Tun tum hian Meghalaya-a kan Kohhranho chanchin tlangpui tarlan a fuhin ka ring a. Heng an chanchin atang hian hlawkna emaw, bengvarna emaw kan chhar theuh ka beisei a ni.

Kohhran din chhoh dan
Kum 1980¹ khan Seventh-day Adventist mi leh sa atangin, West Jaintia Hills, Meghalaya huam chhunga cheng, Pu Devoted Lewis-a leh Pu P. Drowell-a te chuan an Kohhran awmna aia dik leh tha zawk awm thei ngeia

hriatna an nei a. Chutia an rilrua Pathian hnathawh a lan chhoh mek lai chuan, Mizoramah an lokal a. Church of God (Seventh Day), Mizoram Conference Former Chairman & Overseer Elder Dr. G. L. Hnamte te In-a Kohhran hming '*Church of God (Seventh Day)*' tih intar chu an an hmu a. Eng dang sawi lovin an zuang lut ta nghal a. Chuta tang chuan Meghalaya-ah let lehin rawngbawlina an nei nghal a; an chhungte leh anmahni pawh Yeshua Messia hmingin Baptisma an chang ta a. Kum 1980-ah West Jaintia Hills District chhungah hian Church of God (Seventh Day) hi a ding ta niin a lang.

Kohhran than lenna leh tlak hniamna karah: Pastor Devoted Lewis leh Pastor P. Drowell-te hi West Jaintia Hills District, Nongryngkoh khuaah an khawsa a. An phak ang tawka Pathian Thutak an au chhuahpui hnu chuan heng khua - Mynska,

Bamser leh Namdong-ahte hian Kohhran member an lo nei ta a. Chutia rawngbawl na hna tul tak an thawh mek laiin, kum 1987, July thla khan Pastor D. Lewis chu a thi a. Kohhran puipa berte zinga mi a boral takah chuan Kohhranin tlak hniam lam a pan ve niin a hriat a. Mynska leh Bamser Kohhran member-ten a hranga awm ai chuan tiin Nongryngkoh-ah an insawn hial a ni. Hetah hian hmun khatah Kohhran intel khawmin an khawsa ho ta a ni. Heng boruak karah hian mi thar an awm rualin, Kohhran Thurin pensana kal bo tate pawh an awm ve bawk niin an sawi.

Ram hlui atangin Ram thar lamah: Kohhran khawsak phungah hian a darh sarh lo zawng leh rin hran nei mite lak atanga inthiar fihlim dan hi an dap ve thin niin a lang a. Khaw khatah emaw, ram bial khat emawa awmho hi an chin dan phung a tih theih a. Kum 1997 hma lamah pawh khan Pastor P. Drowell te awmna Nongryngkoh khuaah chuan mi thar, ring tharte tan hmun awl, ram ruak a zau loh avangin, ram thar, hmun zau

zawk leh mi thar zawkte tan pawha chen theihna hmun tur an mamawh hle mai a. Chutia hun an hman mek lai chuan Raliang Constituency Bialtu MLA – Bah Wanbait Chullet-a, Presbyterian Kohhran mi chuan an harsatna sut kian nan ama mimal ram, tuna an chenna hmun, ‘Chutwakhu Sarhen’ hi Church of God (Seventh Day) ram atan a pe ta a ni.

He rama chen dan tur leh an khawsak dan tura an inremsiam danah chuan, *“Church of God (Seventh Day) member-te tan he ram chhungah hian In leh lo dinin an sa thei ang a. Kohhran mi ni tawhphawt chu an awm thei bawk ang a; Kohhran an chhuahsan rual rualin Kohhran ramah hian an chengin an luah chhunzawm thei lo ang a, an bungrua an chhawm chhuak thei lo bawk ang”* tih a ni.

Kohhran hlimna karah buaina: Chutwakhu Sarhen khuaa an inben bel hnuah Kohhran thut hmun remfel hna an thawkho thei ta a. Biak In a din hmain, Pastor P. Drowell te In-ah an inkhawm thin a. Pathian

Biak Inkhawmna hi pawnah - mualah te pawh an inkhawm mai thin bawk a. Inkhawmna hmun mumal an neih theih nan Biak In, anmahni lenna tur tawk, kum 2000 chho vel khan an din a, an pun deuh deuh takah chuan Biak In thar an sual leh ta a. Kum 2009 vel khan² Concrete Building-in Biak In sak hna an tan leh ta a. Nimahsela, Kohhran chhungkuaah vanduaithlak takin 2011-ah khan inthenna a lo thleng ta a ni. Kohhran chhunga buaina lian tak a thlen avang chuan Biak In an sak lai pawh chu an chawlhsan ta a; khawih chhunzawm lohin vawiin thlengin a la awm ta zel a ni. Hetiang thil a thlen takah chuan Kohhran Thurinah danglamna awm si lovin Pawl hnih a lo piang ta a ni ber a.

Tuna Kohhran dinhmun tlangpui: Kum 1995 hmalamah Mizoram atangin Elder Dr. G.L. Hnamte leh Kohhran hruaitu dangten remchang an neih dan ang zelin an tlawh ve thin a. Church of God (Seventh Day), Mizoram Kohhran inthen -1997 hnu lamah chuan Kohhran unau (14) lam te pawhin an chhim ve bawk a.

Chutiang karah chuan Pastor P. Drowell mi leh sate chu kan Kohhran lam an bel ta zel a. A fapa, Fullmoon-a te chu Kohhran lehlam zawkah an tan rih ta thung a. Chutiang chuan vawiin thlengin, chhungkaw buaina avangin an hrang ta zel a ni rih ber. Kan rawngbawlinaah erawh duhsak takin tute lam mah thliar lovin, an inhawn ngamna chin zelah Pathian Thutak kan puangin kan hrilh thin a ni.

Chutwakhu Sarhen khuaah hian Pastor Fullmoon-a te lam hi In 6 an awm a. Chung mite chu a tu leh fate an ni. Chutwakhu Sarhen bakah hian Namdong, Mynska-ah leh Moojem khua (Pu Thapa-a awmna)-ah te an awm ve a. A zawng zawnga keini rawngbawlpui theihthe chu Chutwakhu Sarhen, Namdong leh Motyrshiah khuaahte an awm ve bawk a ni.

Rin danah an inchen ta lo!: Pastor Fullmoon Kohhran lam hian Thurinah UPC (Oneness) rin dan tawmpuiin, 'Isua chu Pa Pathian a ni' tiin an inzirtir a. Tin, Aadhaar Card te pawh

Sakawlh nena inkungkaihna a nei nia an ngaih avangin an nei duh lova. Sawrkar aṅanga hamṅhatna lo kalte pawh an hnawl ṅhin niin an sawi a. MNREGA Job Card pawh sawrkar aṅanga tih a nih vangin an nei duh lova; Bank Account pawh nei duh lovin thliarkar rilru puin, Sakawlh hlauin, Kohhranah an awm ve mek a ni.

Church of God (Seventh Day), Mizoram Conference zirtirna ngaihlāa kan thlazar hnuaia inbengbel nghette chuan tisa leh thlarauah pawh a hmasawn zawngin an kal zel a. Chhuan thar zawkte aṅangin lehkha thiam leh thil chinchang hria an lo chhuak ta zel a. Kohhran sum leh pai enkawl kawngah te, Pathian Biak inkhawm phungah te, khawsakhona kawngah te leh thil dang dangah pawh hmasawna hmuh tur a awm zel a ni. Kohhran Thurin Bu hmangin kum 40 chuang an lo inzirtir sual ve niin a lang a.³ Oneness Doctrine zulin Thurin Bu anmahni ṅawngah lehlin an kawh chhun chuan an thiam ang angin rinawm takin an kal ve mawp mawp a. Chutiang karah chuan,

Kohhran chhunga zirtirna danglam awm ang ang, a zualzawpui chu Mission Department-in rawng-bawlina nei tura a tirhte kaltlangin Pathianin thil ropui tak min thawhsak ta zel a. Tunah chuan, Church of God (Seventh Day), Mizoram mite nen danglamna em em awm lovin an kal ve tawh a ni. Tunah hian Evangelist Bhalang Pakem⁴ enkawlina hnuaiah inkaihhraina fel tak neiin an kal mek a ni.

Meghalaya-ah hian Sakhaw dang betute hi an awm nual a. Kristian Kohhran hming pu-ah chuan, Catholic Kohhran an tam ber a, Presbyterian Kohhran, Seventh-day Adventist leh keini Kohhran te hi an awm mek a ni. Keini Kohhrana lo awm tam takte hi Presbyterian Kohhran, Seventh-day Adventist leh Sakhaw dang aṅanga lo lutte an ni deuh ber a. Catholic Kohhran aṅangin mi thar seng luh kan la nei lo thung.

Kohhran Hruaitute leh Kohhran kalphung chhinchhiah tlakte : Kumin 2023 hian hruaitu mumal tak an nei leh a. Heng hi an hruaitu ni lai mekte

chu an ni:

Chairman: Elder Molbi Lamare

Vice Chairman: Evan. Bhalang Pakem

Secretary: Shining Dkhar

Asst. Secretary: Apshuh Pakem

Treasurer: Deilanglei Wahlang

Fin. Secy: Dasembiang Suiam

1. Nuhoi Buhfaitham an tham ve thin a. Nimahsela, pawisaa chantir leh tho a ngaih thin avangin pawisain an pe ta a. Tun hmaa thla khata vawi khat khawn thin kha, pawisaa an khawn takah chuan kar tin an khawn ta zawk a ni.

2. Sabbath Inkhawm Thawhlawm an nei thin a. Hmeichhe Inkhawm Programme-a an thawhlawm chu *Charity Fund* atan hman thin a ni. Eizawna leh hnathawhna avanga khaw chhunga Sabbath ni hmang thei lote pawhin, thawhlawm hi chu an thawh zel tho.

3. Zing Inkhawmah Hmeichhe Inkhawm an nei a. Hmeichhia, rawngbawl theiten hun an chang a. Chawhmaah Naupang Sabbath School inkhawm a awm a. Hmeichhe pakhatin a zirtir mai thin a

ni. Tichuan, a bak zawngin Biak In-ah Sabbath Sikul an kal ve bawk a. Hetah hian Pathian Thu an hriat thiam loh ang angte kha inhrihlin sawihona an nei thin a ni. Thingpui in chawlh an nei thin a, Chawhnuah, Sermon Inkhawm an nei leh mai thin. Anni hian Sabbath tan zan inkhawm an nei a. Sabbath ral zan erawh inkhawm an nei lo thung.

Entawn tur awmte:

1. An ni tin khawsak phungah:

1.1 An thianghlimin, an in leh a vel a fel fai tlangpui.

1.2 A te ber atangin a lian ber thlengin mi welcome an thiam hle a. tawng thiam lo chung pawhin an nui hmel hmang chauh pawhin mi lawm an thiam hle.

1.3 Ruih theih thil, zuk leh hmuama inthliarfihlam lam an ngaipawimawh a; Kohhran Upa leh Rawngbawltu an thlanin, zuk leh hmuam leh ruih theih thil tite chu an thlang ngai lo.

2. Kohhran nunah

2.1 Hun vawn dik kawngah an entawn tlak hle.

2.2 Sabbath-ah thawmhnaw zahawm leh mawi tak an inbel

thin.

2.3 Kohhran Inkhawm phung a mumal, tihphung fel tak an nei.

2.4 Thalai, mipa zawng zawngin rimawi an tum thei vek a ni ber.

2.5 Fakna Hla an sak in theih-tawpin an zai thin. An zai ri pawh a ring thei em em a ni.

2.6 A tlangpuiin, a chhun a zanin inkhawm an ngaipawimawh.

3. Khawtlang nunah

3.1 Khawtlang inrelbawlnaah hruaitu mumal takin an thlang ve thin a. Kohhran ram chhunga chengte enkawl tur hian Village President leh Secretary an nei hrang ve leh a. Village Committee Member 10 an awm baw a. Hetah hian, mipa 6 leh hmeichhia 4 an tel ve a. Heng mite hian Tualchhung mite mamawh an ngaihtuah a, an thawk a. Village Council-ah an thlen thin a ni.

3.2 Kohhran ram chhungah, Kohhran pahnih anga an din mek lai leh Kohhran buaina leh inrem lohna a awm mek lai hian an ni tin khawsakhonaah chuan inmamawh tawnin an khawsa a. An inpui tawnin, an thawkho tho niin a lang.

Tlangkawmna

Hei lo hi ziaak tur tam tak a la awm a; nimahsela, tun tum atan chuan duhtawk phawt ila. A tlangpui kan tarlan takte atang khian Meghalaya, a bikin kan Kohhran mi leh sa bitna hmun Chutwakhu Sarhen chanchin kan hre thei tawh awm e.

(Footnotes)

¹ Pu Muana of Republic Veng, Aizawl sawi danin, kum 1980 khan P. Drowelleh Lewis te hi Silchar – Aizawl a lo hruai thlang.

² Biak In din kum leh sak thar kum hi Chiang takin an hre thei tawh lova. Nimahsela, mi tam zawkte rin hriat dan anga dah a ni.

³ Pastor P. Drowell – a buatsaih nia inziak, KohhranThurin Bu, 1990 – chhut leh tihchhuah hmangin kohhran an lo inenkawl a. Hetah hian Lal Yeshua Fapa nihna ti bovin, Yeshua chu Pa angin ziaak a ni a. Hei hian hun rei tak a tibuai a ni.

⁴ Evangelist Bhalang Pakem hi Mizoram Conference-in Pastor atana a nemngheh tur kha a ni.

Rom Lekhathawn Khuhhawna (Introduction to Romans)

— Deacon HC Lalzawmliana

Rom khua lekhathawn hi Tirkoh Paula ziaak a ni a; kum zabi pakhatna lai vela kohhran sawm pathumte hnena a lekhathawnte zingah chuan a pawimawh leh chungchuang berte zinga an ngaih a ni. He Rom lekhathawnah hian Paula themthiamzia a lang chiang hle a, Pastor, Evangelist leh Pathian thu thiam leh zir mi (Theologian) a nihna tarlan chian niin sawi a ni bawk. Sawi dan dang lehah chuan ‘Christian-te rinnaah hian Messia tih lohah chuan mi challeng leh mi pawimawh ber a ni’ tiin ziaktu thenkhatten an sawi bawk.

He Rom lekhathawn hi a pawimawhzia leh a hlutzia sawi nasat a ni a, a bikin Pathian thu zir mi leh mi thiam tam takten an sawiin an zir chiang nasa hle a, chung zinga he lekhathawn zir binga mi dangte hriata pho chhuaka; a sawifiahna siam hmasa bertu chu ‘Origen Alexandria hi a ni e’ tiin sawi a ni. Tin, Khawvel hriata Pathian thu lama vantlang chung lam, heng mi: St. John Chrysostam, St. Augustine of Hippo, St. Cyril of Alexandria leh St. Thomas Aquinas te hian an chhui zauvin an puangzar nasa hle a; anni bakah mi dang tam tak pawh an awm bawk a ni. Tihian ziaktu pakhat chuan a sawi, Peter-a khan a zahin, a chawimawi thiam hle a, a lekhathawn 2Petera 3:15-16-ah pawh ti hian a ziaak nghe nghe “*Kan unaupa duhtak Paula pawhin*

a hnena finna pek ang zelin inhnena a ziaak ang khan, a lekhathawn dang zawng zawngah pawh chung thute chu a sawi thin” tiin. Chutiang zelin Protestant hnarkaitute, Martin Luther leh John Calvin-a te pawh khan Rom lekhathawn an hmuh dan leh an ngaih dan te an lo sawiin an tlangaupui nasa hle bawk a ni.

Ladd-a chuan tihian a sawia “*Thuthlung Thara Yeshua chung-chang leh a hnathawhte fiah kela sawi chhuaka; a nih dan tur anga hril thiam bertu chu Pharisai piangthar ta Paula a ni*” tiin.

Gromacki chuan “*Galatia hi Dan khermei lam thil atanga Zalen Bu (Magna Carta of freedom from legalism) a nih chuan Rom hi chu Bible ang taka Christian mite tan*

chuan Danpui (Constitution) a ni ngei ang” tiin a lo sawi bawk a ni. Karl Barth Swis, Theologian lar tak maiin Rom lekhathawn Commentary a siam phei chu a lar hle a, an sawi danin “*Theologian-te khelmuala bomb chak tak thlak ang a ni*” an ti hial a, inhniaalna pawh a chawk chhuak nasa hle a ni. chutikhawp chuan Rom ziak hian zir leh chhui a hlawn nasa em em a ni.

Paul lekhathawn sawm (10)-te kha a hlawnma lakkhawm a nih hnu khan, hun hmasa lama kohhranhote hnenah khan a buin theh darh a lo ni ta a ni. Khatia a bu-a siam a nih khan Rom lekhathawn hi a hmasa berah dah a ni a, a chhan chu a lekhathawn zinga sei ber a nih vang a ni. Lekhathawn dang zawng hi kohhran a phunte hnena a thawn a ni a, Rom chiah hi a phun loh kohhran, mimal taka a hriat loh leh a tlawh loh awmchhun a ni. Chuvangin Rom lekhathawn hi ‘*Chanchin tha a kawlte a puanzarna*’ ti pawhin a sawi theih awm e. Tin a lekhathawn zingah Rom hi ama ziah ngei a nih leh nih loh chungchanga sawi kai lo ber, hman atanga vawiin thleng hian a ni chho ta ngar ngar bawk a ni.

Rom lekhathawn hi hlawn lian deuh deuh pali-ah an then a, chungte chu:

1. Chhandamna bulpui atana Pathian felna 2. Mihring mihrinna atana chhamdamna hlawnka. 3. Israel-te pual bika chhandamna 4. Chhandamna avanga Christian-te mawhphurhna.

Bung 1-8 hian Pathian Felna leh Amah ringtute chungchang a tarlan a ni.

Bung 9-11 chhungah hian Jews te buaina tarlan a ni a.

Bung 12-15-ah hian Christian-te nun dan atana tha leh dik tarlan a ni a.

Bung 16-ah hian Lekhathawn tawpna leh Mimalte chibai bukna tarlan a ni.

A Ziaktu Paula Chanchin Tlangpui:

Tirkoh Paula, ahming hmasa chu Saula (Apostle Paul or Apostle to the Gentiles) hi ama insawi dan takin Tarsus Khua, Cilicia rama piang a ni a. Kum AD 2-6 inkara piang nia ngaih a ni a, ziaktu tam zawk chuan AD 5-a piang niin an ziak tlangpui. Cilicia hi Asia Minor ni thin, tuna Mersin, Turkey lo ni ta hi a ni. (Paul/the Core Curriculum, n.d.). Juda mi Benjamina hnam (Tribe) ami,

Gentail-te tirhkoh, Dan (Torah) Gamaliel hnuaiia zir chhuak, Hillela zirtirte zinga chungchuang bik, Ni riat ni-a serh tan. Juda dan khermei taka zawm a, hre em emtu, dan lamah chuan Hebrai-te aia Hebrai zawk, Pharisai (Pharisee is a member of Jewish religious party, Jewish sect, distinguished by strict observance of the traditional and written law). Rome rama piang, Rom khua leh tui nihna neitu a ni (Second generation citizen outside of Rom). Tin, Jerusalem atanga Illurikam (Illyricum) thlenga Messia chanchin tha theh darha hriltu tih hi ama insawi dan a ni bawk.

Ziakmi pakhat sawi dan chuan 'Paula te chhungkua hi khawsak harsa lutuk chhungkua an nih loh hmel' tiin, a chhan chu Rom mi nihna nei tur khan Bungrua (Property) eng emaw tak neih a ngai a, Paula pa hi ram nei mi, mi hausate zinga tel phak a ngaih a ni. Tin, Paula pawh hi mi vantlang chung lama awm niin a rin theih bawk a, a chhan chu Gamaliel-a bula zir thei chin a nihna khan a tichiangah ngaih a ni. Tin, a nu leh pate hi 1st C.B.C-a Rom sawrkarin Palestine a run vak a, a tihchhiat tuma, Galilee khua Gischala atanga Tarsa-a tlanche ta niin sawi

a ni bawk. Tin, Jerusalem-a dan zir tura a kal hian kum 12 emaw 13 emaw a nih rin a ni a, chu chu AD 12-15 inkar a nih rin a ni bawk. Juda mipa naupang kum 13 an tlin hian an Juda kalphungah Bar Mitzvah (Son of Commandments/law tihna) an nei thin a, chumi awmzia chu Juda mipa naupang tawh phawt chu kum 13 an tlin hian an sakhua thila mipa puitlingin a tih ngei ngei tur leh an zir thinte an tih tan theiha; an zir tan theihna atana hun an hman thin hi a ni. (Chuvangin Paula pawh hi Kum 12-13 a nihin Jerusalem-ah hian Dan zir tura kal niin chhut a ni). Chu Bar Mitzvah an neih zawh atang chuan Tifellin a inbel a, Synagogue-a inkhawmah te, an sakhaw hun pawimawh leh hmun pawimawhahte an telin an lut thei ta thin a ni. Mosia dan an zirin; an chhiar thei a, chutiang zelin chawlhkar laihawla zing leh tlai tawngtainaahate an tel thei tawh a ni. Hmeichhia erawh chu kum 12 an nihin Bat Mitzvah an nei ve thin.

Paula tawng hman bera an sawi chu Koine Greek a ni, Hellenistic Greek tih a ni bawk, classical Greek leh Alexander the Great-a'n BC 330-a hnehote tawng tualleng inpawlh a ni. Inbiakpawh nan bera a hunlaia an hman a ni a, tunlaia English khawvel indawr tawn nan

kan hman ang hi a ni awm e. Paula hi khawvel chi thum inpawlh atanga chhuak a ni a: Rom mia pianga, Greco-Romans leh Hellisnistic culture-a thanglian, Hebrai finna leh thiamna a zirchhuak, chawm len, Messia chanchin tha avanga koh chhuah thlarau thianghlim hriak tih leh finnaa thuam. Hengte a nih avang hian Kristian Theologian ropui berte zinga chhâl a nih theih phahna chhan pawh hi a ni.

Paula hi a namai lo hle a, a hunlaia Philosophy ropui tak tak Platonism, stoicism leh Epicureanism-te kha a hmang thiamin a hre hneh hle a; Greek ho tawngkam thluaithlum (rhetoric) dan leh chelek dan heng:- diatribe, the fool's speech leh peristasis catalogue te hi a hmang thiam em em a, khawvel lama mifingte hnial nan a chhawr tangkai hle a ni. Tin, Pathian thu-a mi hneh nan pawh a hmang thiam hle. Chuvangin Paula hi chu Palestine ram Juda-te ang ni lo, Hellenized Judaism an ti deuh bik a ni, a chhan chu Rom ram awp chhunga Hellenistic culture leh Greek Philosophies khawvel a hriat em vang a ni.

Tin, Paula hi mak deuh mai chu a chettlatna leh mission hna a thawhna hi khawpui, mi tamna

zelah a khawsa thin, a chhan ber pakhat chu amah hi hmun lûn leh laili laia piang, Jerusalem khawpuia thang chho a ni a, tin, Rom citizen a neih avangin Rom zingah leh a ram chhunga thusawi theihna a neih avang te, tin, amah lah mi thil hria, mi thiam, rual pawl thiam tak leh khawpui nun man tak mi a nih vangin mipui tamna hmun, khelmual, rorelna In, mipui punkhawmna, sumdawanna hmun lun laia Pathian thuhiril hna thawh kha nuam a tiin; mi tam tak takin an lo hriat phah thin vang a ni. Chutianga khawpui mi tam tak an lo harh chuan khawvel zau zawkah nasa takin chanchin tha a darh nghal dawn tih a hriat tlat vang a ni.

A zin dan chhinchhiaha atang chuan Paula hian Mel sing khat dawn thuak a zin kual nia sawi a ni. khawmualah chuan kein a kal deuh ber a, a chang chuan sakawr tawlailir a hmang bawh thin. Ni khatah 15-20 miles ke chuan a kal tlangpui a, tawlailir chuan 25-30 miles a kal thin niin zir mite chuan an sawi bawh.

Tin, Kum zabi pahnihna laia Kohhran rawngbawltu (Presbyter) sawi dan chuan Paula hi 'Pa tè lam, lukawlh, bawp kual tak, mi hrisel tak, mithmul inzawm leh hnar

bawng, sei ve tak nei, ngaitnat-awmna ngah leh mi khawngaih thei tak' niin a sawi.

AD 33 khan Damsaka khaw daih êngin a chhun thlu a, Messiah a ko chhuak ta a, chuta țang chuan Messia aia palai rinawm niin a thih thlengin Tirhkoh hna a thawk ta a ni. AD 64/65 Khan Emperor Nero-a'n Aque Salviae hmunah a lû a tansak a, a thi ta a ni, a thlân pawh Bascilla of St Paul maicham hnuiah a la awm reng nia ziaak a ni. A thih hma hian Caesarea-ah kum hnih tântir a ni a, a hnuah Rome-ah kum hnih tantir leh a ni ta bawk a ni.

Rom Ziah hun leh Ziahna Hmun:

Tichuan Rom lekhathawn hi AD 57-59 inkara ziaak anga ngaih leh dah a ni a, ziaaktu ðhenkhat chuan AD 57-a ziaak niin an sawi a; a pawmawm berah an ngai bawk. Tin, Rom lekhathawn hi rawng-bawla a zin vawi thumna hun laia a ziah a ni a, a ziahna hmun hi Corinth khua (Korinth) niin an sawi. Korinth-ah hian thla thum chhung a châm a, chumi chhunga a ziah niin sawi a ni, Rom 16:13-a kan hmuh angin Gaia te In-a a thlen laia a ziaak a ni a, he Gaia hi Korinth-a Kohhran a din laia Baptisma a chantir ngei kha nia rin a ni. He

lekhathawn hi Phoibi (Phoebe) Kenkriai khuaa kohhran rawng-bawltu (deaconess) a kentir a; ani kaltlanga thawn a ni. Kenkriai (Cenchreae) hi Korinth ațanga mel 8-a hlaa awm a ni. (12-13 Kms). Tin, Korinth lekhathawn pakhatna leh pahnihna hi Ephesi khuaa a awm lai, AD 55 kuma a ziaak niin sawi a ni bawk.

Þhenkhat chuan Rom hi 'Paula'n ama kut ngeia a ziaak a ni lo' ti an awm ve bawk a, an țan chhan chu Rom 16:22-ah khan "Kei, Tertia, (Tertius) he lekhka ziaaktu hian Lalpa hmingin chibai ka buk a che u" tia inziak a nih vang a ni. Amaherawhchu, Paula'n ama kut ngeia a ziaak tih ni lo mah se chiang taka lang chu Rom hi Paula'n ama ka ngei a sawi chhuah leh a kaihhruaina hnuiaia a ziaak tih a chiang a, a chhan chu a bung tir berah "Paula, Yeshua Messia bawih; tirhkoh ni tura koh, Pathian chanchin țha hril tura tihhrana chuan" tiin țan a ni phawt a, chuta chiang ta chu Tertia hi Amanuensis an tih a ni a, a awmzia chu Mi thu leh hla ziaak chhuaktu, chutiang thu leh hla lama mite lo țanpui tihna a ni, chuvang chuan Rom hi Paula'n ama ir-awm chhuak ngeia a sawi Tertia'n a lo ziah thlaksak niin a lang zawk a ni.

KRISTIAN ETHICS

Lalramdinmawia

Thuhmahruai

Nungchang leh khawsak dan inzirtîr hi mihring nunah chuan a pawimawh em em a. A bikin, tunlai khawvêl danglam chak takah hian awmdan mawi leh tih tur kan inkawhmmuh zel hi a pawimawh em em a ni. Tun tumah hian '*Kristiante awm dan tur leh tih tur*' (*Christian Ethics*) zirho kan tum dawn a ni.

Ethic chu engnge?

Ethic tih hi saptawng a ni a, Grik tawng - '*ethos*' tih atanga lak niin, a awmzia chu 'nungchang' (*behaviour*) leh 'tih dan' (*custom*) sawina a ni. Dictionary sawi dan chuan, '*nungchang awm dan leh rilru lam thutlûkna chungchâng zirna a ni*' ("*the study of standards of conduct and moral judgement*"). Ethics chu tih tur leh tih loh tur sawina a ni mai lova; mihring nungchang siamtu thil hrang hrang hi a zir Chiang a, a chhânletna a ngaihtuah thin a ni. Thil lo awm chhan a zir Chiang a, harsatna leh tuartute chhanchhuah leh tanpuina hna a ngaihtuah nghal thin a ni. Mihring nungchang leh ngaihhlut zâwng zirna (*Science of human conduct and values*) hi a ni ber awm e.

Ethics thil tum

Ethics chuan inkaihhruaina a siam a, mihringte mawhphurhna a ngaipawimawh a, mahni mihringpuite laka mawhphurnate, midang tanpuina lam te hi a zirtir uar ber a ni. Hmanlai atanga thil tha lo kan chhawm ang chi hi a vei a; mihring nun tibahlah thei thil hi nuai bo a duh em em a ni. Khawtlâng sualna (*social evil*) hi a hmachhawn a, dikna hi a ngai-pawimawh thin a ni.

Mihring nungchang a dik leh dik lo, tha leh tha lo, pawm theih leh pawm theih loh, Pathian lam leh khawvêl lam thilte hi Ethics-chuan a thliar hrang deuh ber a. Mihringte awm dan atana tha ber leh thiltih leh a tawpna awm dan tur thlengin a sawi a. Eng ang nungchang leh khawsak dan hi

nge tha chu? Eng vanga tha nge a nih? Mihring awm chhan ber hi eng nge ni? Heng zawhna tam takte hi Ethic chuan chhanna a siam thin a, Pathian hian engti turin nge min siam a, eng rilrupu turin nge min siam tih zawhnate hi Ethics kan tih hian a chhang thin a ni.

Engtin nge miin tha leh tha lo a thliar hran? Tih hi kan ngaihtuah a pawimawh viau mai. Mi zawng zawng hian kaihruaitu leh zirtirtu kan nei vek a; kan thil thliir dan pawh min hmuhtirtu kan nei a ni. Kan hriateng tur chu, mi chi hrang hrang kan awm a, chhungkuaah leh khawtlângah kan khawsaho a, mi dangte ngaihhlutzawng inzahsak hi a pawimawh khawp mai. Tumahin mi dangte khawsak dan leh nungchang kan va sawisel ngawt tur a ni lo. An khawsak danin midang tan harsatna a siam a nih ngawt loh chuan va sawisel tur a ni lem lo. Dawhtheihna tlâkchhamna hi thil tha lo (immoral) a ni.

Kristian Ethics

Hnam leh sakhaw hrang hrangin nun dan leh inzirtîr dan leh inkaihhruaina an nei deuh vek

a. Kristiante tana nun dan inkaihhruaina inngahna chu BIBLE hi a ni. Bible chuan awm dan tur THUPÊK leh tehkhinthuon min hrilh Chiang hle a. Kan tih tur leh tih loh tur min hrilh Chiang hle a ni. A tlangpuiin Kristian chuan nungchang tha inzirtirna chu a pawm vek a, Bible-in a sawi loh, entir nan, mei zûk chungchangte chu zirtir ngai lova a ruat a ni maithei. A tlangpuiin, Kristian chuan Pathian zia - thianghlimna, felna leh hmangaihate hi a ngai-pawimawh thin.

Kristian Ethics-in a ngaihpawimawhte:

1. Mihring nun thiang hlimna leh hlutna : Pathian aţanga nunna hi kan neih a nih avangin Pathian chauhin paw sawi lo nunna lak theihnaa thuneihna a nei a ni. Tual thah hi Pathian duh loh zawng a ni. A chang chuan kan nun hi a beidawng thin ang a, mahni nunna hial pawh beidawn avanga tih-tawp duh chang te kan nei thei a, a chang chuan hmelma kan nei a, kan hmelmate nunna laksak duhna hial pawh kan nei thei; mahse, Pathianin nunna hi min pek a nih

avangin kan zah tur a ni.

2. Tisa châkna laka invawn thianghlim : Kristian chuan kan taksa hi PathianThlarau thianghlim In a ni tih hriaa, thianghlim taka vawn tur a ni. Tisa châkna sual lamah inthiar fihlim tur a ni. Tin, kan taksa tichhe thei ruih theih thil lakah kan fihlim bawk tur a ni. Kan taksa hriselna kan ngaipawimawh tur a ni a, ei leh in thianghlim leh hrisel kan ei tur a ni a. Taksa hrisel nan insawizawi te kan uar tur a ni.

3. Zalênna: Mi tu pawhin thil neih theihna zalênna/chanvo an nei a. Tu mahin he mimal zalênna hi an lâk bosak tur a ni lo. Duhâmna chu milem biakna a ni (Kol 3:5). Kan mamawh ang tho hi mi dangin an mamawh ve tih hriat a pawimawh a. Mi tin hian thil neih theihna dan leh zalenna an neih hi ngaihpawimawh tur a ni.

4. Rilru dikna : Mi tu pawhin thutak an sawi thin tur a ni a, thutak aiawhin a ding ngam bawk tur a ni. Kristian chuan dâwt a sawi tur a ni lova, thudik chu

huaisen takin a sawi mai tur a ni. Biak In chhunga dikna kha khawlaiah pawh dik a ni tur a ni a. Kohhran huang chhunga rinawmna kha ni tin khawsaknaah pawh a langchhuak tur a ni.

5. Hotute thuawih: Rorêltute thuawih tur a ni. “Roreltua awmte hi Pathian ruat an ni” (Rom 13:1) tih a nih kha. Kristian chu khua leh tui tha a ni tur a ni a, a theih chen chen sawrkâr a tawiamw tha tur a ni. Kohhran hotute thu pawh awih tur a ni. Rorêlna dik lo leh suahsualna rawng kâi thil a awm a nih erawh chuan huaisen takin a do ngam tur a ni thung ang.

6. Hmangaihna: Miin an chungang an tiha an duh tur ang bawkin mi dang chungang an ti tur a ni. Tin, Mahni inhmangaih angin mi dangte pawh hmangaih tur a ni.

Kan awm dan leh khawsak dan kaihruaitu lian tak chu kan ngaihsan zawng (value system) hi a ni a. Bible chuan Pathian leh mi dangte rawng bawlsak turin min zirtir a, mahni lam inhai vûr

leh intihropuina lam hi chu a zirtir lo. Sum leh paia duhâm min zirtir lova, sâna leh ropuina aiin mi dangte tana inpekna a sawi uar ber zel a ni.

Khaikhâwmna: Kristian ngaihtuahnate, thiltihte chu Pathian thu nen a inmil tur a ni. Bible-in nungchang a zirtirna chiang tak chu Thupek Sawm (Exodus 20, Deuteronomy 5) hi a ni.

1. Keimah lo chu pathian dang nei suh.
2. Milem be suh.
3. I Pathian hming a naranin sawi suh.
4. Chawlhni (Sabbath) serh rawh.
5. I nu leh i pa chawimawi rawh.
6. Tual that suh.
7. Uire suh.
8. Ru suh,
9. I vengte hêk suh (hretu derah țang suh).
10. I vengte thil awt suh.

Rilru lam inkaihhraina (moral principles) hmasa ber leh ropui ber chu Pathian hmangaih hmasak phawt tur a ni a, chumi dawtah mahni mihringpuite hmangaih leh tur a ni. Miin nungchang duhthlanna a siam dawn reng rengin heng thupek hi a ngaihtuah hmasa tur a ni.

(Rawngbawlna huang chhunzawmna)
 țhutkhawmna Deacon HC Lalzawmliana, Luangmual te inah an nei leh a. He committee-ah hian Chairman a nih angin rorel a kaihruai a ni. May 22, 2023 khan Kohhran Office, Khatla-ah Mizoram Conference OB-te leh Pastor-te retreat neih a ni a, infuih tharna hun țha tak neih a ni.

May 23-ah Aizawl chhuahsanin Lunglei Circle bial a fang haw nghal a, May 23-25 chhung hian heng khua – Serchhip, Thenzawl leh Sekhum te a tlawh. Elder Vanlalsanga'n a bial fang hi țawiaawmin, Chanchin țha dik la hre lote hnena hrihna hun țha tak an neih theih phah baw a ni.

May 27 & 28, 2023 (Sabbath & Pentikos): Heng nite hi Lungleiah a hmang a, Sabbath sikulah a zirtir a. A tuk Pentikos-ah Pathian Thuchah sawina a nei baw a ni. Pentecost hi ruai nen hman tum an ni a, kohhran chhungkuaah dam lo an awm nual avangin țhulh leh niin thingpui leh a hmeh tui tak nen an hmang ta a ni. Tin, Sekhum lam ațangin Elder H. Zosailova te nupain an hmanpui baw a, an lawm hle. Lalpan rem a tih chuan, Leiteah Sabbath hman leh a tum a, Hnahtial leh Pangzawlte pawh tlawh nghal a tum.

SÛNNA



H. ZOTHANSANGI K-68

Pi H. Zothansangi hi Pu Lengduna (L) leh Pi J. Chalhuni (L) te inkarah August 15, 1955 khan Thingsai khuaah a lo piang a. Thingsai khuaah hian seilianin High School a zir thleng a awm a ni. An unau hi sawmpathum (13) an ni —

1. Kaphrangi (L)
2. Upa H. Thangkima
3. Kapchhungi
4. Lalzarzovi(L)
5. Chalkunga (L)
6. H Zothansangi
7. H. Malsawmtluangi(L)
8. H. Lalhmingmawii
9. H. Lalrinthanga(L)
10. H. Laldengi
11. H Sangpari
12. H Laltanhuaia(L)
13. Samuel Lalthlengliana (L)

Pi Zothansangi hian Thingsai khuaah pawl kua (9) thleng a zir a, pawl kua a zir zawh hian Christian Hospital, Serkawnah Nurse hna a zir a. Lehkha thiam thei ve tak leh lehkha zir taima tak a ni a, Nurse hna a zir chung zawng hian a ti tha ber a ni tluan vek thei a ni. Kum 1980 khan Health Worker hna hmuin Serkawnah hna a thawk tan a, hemi hnu hian hna avangin Mizoram hmun hrang hrangah a awm kual a; Ralvawng, Khawbel, Champhai, PTC Lungverh, Sakawrtuichhun, Kulikawn Damdawi In leh Sairangah te a awm a, Kum 2021 khan Superannuation-in a pension a, a pension hma deuh hian Community Health Officer-ah a kaisang ve hman a ni.

Kum 1979 khan M. Lalthansiamia (L), Republic Vengnen inneiin fa panga (5) an nei a, chungte chu:-

1. Israel Lalvohbiki(L)
W/o Lalrinawma, Republic
2. Diana Lalsawnliani
W/o Lalhmangaiha, Champhai
3. Veronica Zoramawii,

4. Lalnuntluanga,
5. Samuel Lalmalsawma
H/o C. Lalmalsawmi,

Tu hmel panga a hmu hman. Amah hi mi taima tak a ni a, hnathawk lova awm thiam lo mi a ni a, mipa hna leh hmeichhe hna ang chite hi a thawk kawp vek thin a ni. Nu zaidam tak a ni a, a ngilneiin mite tanpui hi a nuam tih ber a ni thin a, thingtlang hmun hrang hranga an awmnaah pawh midangte tana a inphal thin em avang hian mite ngainat pawh a hlawh viau thin a ni.

Kohhran hi a hmangaihin a phak tawka inhmang hram hram thin mi a ni; a damlo a nih ngawt loh chuan inkhawm a thulh ngai lo. Tunah hian PKHP Aizawl Local-ah President ni lai mek a ni.

A pasal Pu M Lalthansiamia hi July 13, 2019 khan a boral a. Hemi hnu lawk kum 2020 May thla khan a fanu Israel Lalvohbiki'n a boralsan ve leh a. A pasal leh a fanuin an boralsan hi a tuar hle a, khaw-

har taka awmin a lungleng thei hle a. Pathian hi inhnem nan a hmang ber thin a ni. May thla laihawl vel atang khan a kal na a chhuak a, a khua a sik bawk a, May 22, 2023 khan Doctor anrawn a, Doctor chawh angin damdawi a ei nghal a, hmasawn ve zela kan in hriat lain May 30, 2023 zanriah eikham atangin a chau deuh thut a, theihtawp chhuaha bawih-sawm nghal niin, Damdawi Inpanpui tura kan inbuatsaih lain zing lam Dar 12:45 khan min kalsan ta a ni. Hemi ni chhun dar 1:00-ah Phunchawng Venga an chennaah Pastor ST John Beingachhie'n a vui a, Thlanmualah Elder David L. Hmar-in a thlah liam ta a ni.

A kalsan tak a tu leh fate, a unaute leh kohhranhoten kan ngaiin kan ui takzet a ni.



PKHP Aizawl Local O.B

PASTOR LAK TUR HRIATTIRNA

Church of God(Seventh Day) Mizoram Conference,
Pastoral Ministry chuan, Fulltime-a rawngbawltu tur Pastor
a la dawn a, dil duh chuan Dilna hun hawn chhung hian
Kohhran Office, Khatla, Aizawlah Chairman leh General Sec-
retary Address-in ziaka dil theih a ni ang. Dilna hi pangngai
taka ziakin PDF-in Whatsapp kaltlang pawhin a dil theih baw
ang.

Hna awm zat	: Post 2
Dil theih hun chhung	: June, 2023 thla chhung
Written Test	: 5 th July, 2023 (Nilaini)
Personal Interview	: 9 th July, 2023 (Sunday)
Interview-na hmun	: NPSS Hall, Aizawl Local Church, Khatla South.
Dil thei chin	: Constitution & Rules Part-III Bung-1:1(1)-nain a sawi ang hi dil thei chin chu a ni.



(Elder DAVID L. HMAR)
General Secretary